

Durante dianan di fiesta a registra dos caso mas AÑA A HABRI CU CASO DI ABUSO SEXUAL DI MUCHA Autornan no ta worde entrega na Polis

ORANJESTAD (AAN): Aña 1991 a cera cu un total di 30 caso di abuso sexual di muchanan. Ora ta papia di casonan no ta papia automaticamente di e cantidad di muchanan involvi. Den un caso por tin mas cu un mucha involvi loke ta muestra cu e cantidad di mucha cu ta bira victima di abuso sexual ta mucho mas halto.

Durante dianan di fiesta na fin di aña dos caso mas di abuso sexual di muchanan a worde poni na atencion di Voogdijraad. Hunto cu e 28 casonan cu ya tabata registra a alcanza un tristo total di 30.

Aña a habri cu otro caso lamentable di abuso sexual y

atrobe mucho a keda marca pa resto di bida.

Mientras por papia aña pasa di un averahe di mas di dos caso di abuso sexual di mucha pa luna ta notable cu esnan cu haci nan mes culpable di e crimen aki pa un gran parti no ta keda entrega na autoridad dor di personanan responsable pa e muchanan.

Cifranan di Polis pa Mucha ta papia di un total di 11 caso cu a worde denuncia aña pasa. Si compara e cifra aki cu esun di Voogdijraad kier meen cu 19 persona cu a abusa sexualmente di mucha no a worde poni den man di autoridad pa un of otro motivo. Talbez e personanan re-

sponsable pa e muchanan no kier perde nan partner di bida y ta prefera di no lague paga pa loke el a haci enbez di perde.

Ta posible tambe cu pa miedo e personanan aki no ta acudi na Polis cu e casonan aki. Di tur forma e personanan aki ta haya oportunidad di cana rond manera nan ta haya ta bon y e mucha por haya su mes den e problema di venganza pasobra el a habri su boca. E mucha por bay cay den man atrobe di e autor di e crimen.

Mientrastanto comunidad mester busca formula pa bay atende cu e tipo di crimen aki. E hecho cu tanto mucha

ta bira victima di abuso sexual ta un indicacion serio cu comunidad ta enfermo.

Aunke pa años ta worde muestra ariba e hecho cu e cantidad di casonan di abuso sexual di muchanan ta aumenta te ainda ningun paso oficial a worde tuma pa siquiera investiga kico ta e motibonan real pa e problema grandi aki. Cifranan ta muestra cu mucha muher y mucha homber ta bira victima di abuso sexual y cu e peso ta igual pa nan tur dos.

Na varios ocasion charlanan y programanan especial a muestra cu e cambionan den comunidad ariba tereno moral ta haci muchanan bira

victima. Por ehemplo divorcio y homber straño den cas; pelicularnan pornografico; droga y mal uso di alcohol ta motibonan pa loke ta pasa actualmente.

Oficialmente ningun comision a worde instala pa investiga e asuntonan aki y mira ki pasonan por tuma. Leynan cu ta regla castigonan no a worde revisa pa mira si cambio ta necesario.

Mientras comunidad ta keda pasivo mas caminda ta worde habri pa abuso sexual di muchanan cu ta keda un di e crimennan di mas grandi cu por existi.

MEDICONAN TA BIRA JUGUETE DI MINISTRO

ORANJESTAD (AAN): Durante entrevistanan den Staten e representantenan di mediconan a muestra cu nan

no por ta di acuerdo cu dokternan ta haya nan mes ta bay traha cu un contrato di dos aña. Un miembro di e frac-

cion di MEP lo a bisa cu esey no ta un problema. E lo a bay papia e asunto aki na forma serio cu Gobierno pa cambia e termino di contrato den tres aña.

Aparentemente e voz di e miembro di MEP no tin mucho peso pasobra ayera a sali dilanti atrobe cu ta un contrato di dos aña e mediconan ta haya y no mas.

E contrato aki ta worde renoba despues di evaluacion. Esaki ta henter e problema pasobra tur hende ta puntra nan mes ta kende lo bay evalua e mediconan y con e evaluacion lo tuma lugar.

Mediconan ta sinti cu nan ta bay bira juguete den man di Gobierno pasobra e Aseguro Medico General ta bay duna Ministro tur autoridad pa haci y deshaci. Pues e evaluacion lo depende tambe di e bon gusto di e Ministro y esnan cu e Ministro pone na Aseguro Medico General.

A worde muestra cu mester tene cuenta cu Gobierno a trata dokter Hermans. El a haci un bon trabao pero a haya retiro. Ta asina mediconan ta bay worde evalua despues di dos aña?

Lodo di pier cu a keda na mitar ta amenaza costa PALM BEACH NA PELIGRO!

ORANJESTAD (AAN): Ora permiso a worde pidi pa traha dos pier den lamar Gobierno no a existi e garantia cu e piernan mester worde bon traha y acaba. Ora esaki no a socede Gobierno no a tuma ningun paso pa evita e peligro. Resultado ta cu awor lodo ta forma un amenaza pa Palm Beach manera expertonan a bisa.

Segun informacion alrededor di dos aña pasa Ramada Renaissance a haya permiso di Gobierno pa traha dos pier den lamar den cuadro di e proyecto hotelero cu na e momento ainda tabata cana.

A cuminsa cu construcion di e dos piernan den lamar. Uno a keda cla y a keda completamente acaba y no ta forma ningun peligro. Pero e otro a keda na mitar y ningun paso a worde tuma pa evita loke ta pasa actualmente.

E pier ta worde prome construi cu baranca y cu klei y lodo. Un substancia diki cu despues mester worde cubri pa asina evita cu e ta los y yega beach.

Despues cu a stop cu con-

struccion di e pier e lodo a cuminsa los. Recientemente ora tabata tin lamar bruto un parti di e lodo a los y yega costa caba. Tabata trata di un parti chikito di e klei y lodo cu tin deponi na e sitio. Despues di algun dia lamar a laba e deposito na costa bay cune.

Pero expertonan den e materia a asegura cu si bolbe yega ocasion cu lamar ta bruto mas lodo lo bay los y lo bay alcanza costa. E santo blanco canto di lamar lo por keda cubri cu lodo y klei y lo bay mester haci masha trabao pa drecha e situacion.

A worde muestra cu no por warda mas pa tuma pasonan necesario den e asunto aki pasobra ta trata di Palm Beach y un di e sitio mas bunita di Aruba. Mester bay evita cu e lodo y klei por yega costa.

Ora lamar ta abao ta parece cu tur dos pier ta solido. Pero ora lamar ta halto por mira claramente con ya esun pier cu no a worde termina ta bay casi perdi den olanan loke ta indica cu no tin mucho tempo pa warda mas.

ARUBA ROYAL RESORT A CELEBRA UN DIA ALEGRE



Durante e ultimo dianan di aña 1991 tabata tin uno alegre na Aruba Royal Resort ora cu Sr. y Sra. Sherman di Detroit a celebra nan di diez bishita na e isla di Aruba. Na e ocasion aki e pareha a tuma e iniciativa pa conmemora e evento alegre door di keda na Aruba Royal Resort. E foto di e ocasion aki ta ilustra e momento cu e pareha Sherman a ricibi nan premio for di Gina Gnecco, di e departamento di Relacionnan Publico di e Aruba Tourism Authority, y Paul van Frank, e Resort Manager.